

重修慶陽府志卷之二十六

孝義

孝與忠皆根於天性發於不自知未有事親孝而事君不忠者故孝為五常之本百行之源也若夫匹夫慕義何處不勉凡好施與重然諾亦足多焉舊志所載無幾因網見聞復得如干人急錄之以為敦倫好誼者勸志孝義

唐

侯知道程俱羅 俱靈武人居親喪穿壙作塚皆身執其勞鄉人助者即哭而却之廬墳次哭泣無節知道七年俱羅三年不止知道垢塵積首率夜半傳墳踊而哭烏獸為之悲號李

慶陽府志

卷之二十六

孝義

一

華作二孝贊表其行見唐孝友傳按靈武唐屬環慶故特志之

明

塗 詳 本衛人景泰間鄉舉父卧病三年躬侍湯藥日夜籲天流血願以身代及父歿哀毀骨立咽不容粒期月而逝人名其坊曰孝子門

魏大用 本衛人早孤母病七年躬持湯藥不怠及卒哀毀及之以血因喪及葬廬墓三年負土山積墳在城西原畔成三里人指為孝子塚

高 雄 本衛人正統間兄邇販淮塩久絕音問雄弱冠遍方

訪江淮再越歲始得凶耗兄為盜徒陳景諒所殺也具詞江都令陳賄通公私詞不得理令以諭和息鬻雄泣曰賣兄自利有人心者不忍為也令愀然改容竟坐景諒極刑因得尸於塩井歸殯焉鄉人至今稱為義士云

王良 本衛人良方姪父恭遠出商販莫知所之及長充庠

生貢入太學例得歸省遂辞母徧曆江淮覓父所在忽夢老人曰何苦遠遊汝寧爾父在焉尋至其處果得之時恭年八十一不能歸良盡鬻衣裝輿而還人稱之曰王孝子

錢經 本衛錢千户下舍人早孤事母撫弟以孝友著誼孚宗族行表鄉里死之日自士大夫以及走卒兒童無弗痛悼

慶陽府志

卷之二十六

孝義

二

者

衡鏞 前所人長鬚偉幹面如冠玉力學弗倦舉正統辛酉科亞魁事繼母最孝鄉黨以純德稱未仕卒

道泰 環縣人登成化賢書任山西太原教授蔚有文名士皆師之陞晉寧知縣以親老歸養承歡備至人咸稱為孝子云

倪斌 本衛指揮使為人豪宕不羈而性復篤至父玉邁疾將危斌夜焚香號泣於斗並禱神誓以身代弗效乃割股知羹以進父覺味異不日廖人以為孝感所致

高世美 本衛舍人充庠生父玉賈於雲南二十年不返及聞

其歿於旅邸世美匍匐萬里歸葬焉鄉人哀之

趙璋 環縣人農家子事二親孝母卒廬墓負土時值大水家業湮沒卒終三年每夜有野雉伴廬而宿人謂孝行所感嘉靖間詔旌其門

楊來鳳 安化人少販江淮事親孝父歿年已逾七十矣哀痛七日不食及塋廬於墓三年負土封樹事母飲食不敢離側白首強為壯容以娛母母^壽逾九十而卒人以老菜子擬之嘉靖間旌其門

陳志聰 寧州人親歿廬墓三年封塚取土以手掬之而貯衣以頭代杵聞禽獸音即棄之別取蓋恐以為汗也久之

慶陽府志

卷之二十六

孝義

三

封壘然鄉里重之

劉廷燧 寧州人領正德間鄉薦事二親孝及歿廬於墓側三年妻妾不得餽餉

楊儀鳳 都御史綸之子父病革時適弟朝鳳以待御宦南儀鳳朝夕侍湯藥顛天求代易簣日哀毀不欲生以母命始稍啜粥孺慕終身

蔡蕃 慶陽人蔡鎮撫族也為人莊雅古人古貌少有文名父仲奇之乃與翰粟入監使得專業父猝病風不省年已七十矣蕃日侍湯藥扶掖起居未嘗離側及父歿哀慟過情初授寧國丞有政聲以母憂復除費縣費人愛之陞大寧知縣

解綬歸皓首龐眉人皆目為耆德

趙一夔 安化人縣庠生嘉靖己酉秋大水居民漂沒殆盡夔為人所援得免聞母已被沒復投水覓之不得俱死有子方數歲亦同入水忽於波浪中得渡於大木之上人謂孝感所致云

康 錦 慶陽人有膂力工騎射生平以忠孝自值嘉靖丙午邊寇深入將至慶陽錦持兵單騎往探之行未二里許遇敵兵突擊身被數創以甲堅不死誓不與賊俱生乃鬻產治棺衾生祭其母曰兒不孝一念許國意定矣不能復顧母也盡以後事付侄躍馬而去十餘年每對壘奮不顧身軍門嘉

慶陽府志

卷之二十六

孝義

四

其義勇一日心動念母即日歸養不數月母卒哀毀幾絕又念祖父陣亡三世皆寄殯各邊乃匍匐輿櫬歸葬焉廬墓側負土自封相厚者知錦年衰乏嗣強之不歸終三年

黃 梅 府庠生為人純謹無瑕襁褓時失怙恃伯父撫育承嗣梅立弟梧為父嗣後亡梅事孀至孝二父諸母間言

李 澄 安化人一云環縣人母病二年雙目俱盲百治不效澄自檢醫方得羊肝補目之說曰以羊補不若以人補以子補母是為還元其效必矣遂焚香告天刺脇割肝一片和羹以進母食之味美一夜病愈雙目復明澄亦無恙人謂至孝感神因稱李割肝子果以恩貢拔佐獲鹿有政績

苟 鈞 環縣人例授散官孝友夙著性磊落不事詩書而不失禮義嘗督修庠序每出己資以助有司重之舉鄉飲事嫂節婦周如母撫侄志仁無異己出鄉人無大小莫不敬仰云閩應儒 字一菴寧州人隆慶庚午經魁性至孝家貧茹苦攻惟初授山西孟縣教諭曆陞雲南通判所至有政聲時洞苗大亂出奇制之後致仕歸調鄉里恤宗族年七十餘卒市巷皆為震哭

張 經 合水人三世同居經亦敦孝友族黨鄉里慕德推讓且賦性慷慨輕財尚義時值年饑輸粟賑貸不受券約邑人以義士稱之

慶陽府志

卷之二十六

孝義

五

李 棟 太學生澄之族孫也天資敦朴祖父兄弟三世同居棟幼失怙事母沈以色養棟頗嗜酒遵母戒終身不飲母嘗罹風疾年久不愈棟躬侍湯藥晝夜不怠建孫真人祠朝夕泣禱夜夢一道人來醫翼日疾痊年至七十而終

李 萃 安化人廩生父病祈禱願以身代及流賊破城力戰被執大罵賊義釋之勸建義學造就邑中子弟人感其德所著有志孝圖解

楊光才 寧州人未嘗學問事親以孝稱嘗遇失金赴河者詢其數以二十金對才曰我得之可還汝其人色喜及如數付之訝非原金才佯答曰汝金適用盡以吾囊償之 其人

持去崇正二年饑出所儲賑粥百日餘所全無數時餉匱才以豆二百餘石慨助王師

栗有恩 寧州人性長厚粗知讀書行坐常佩忍字善為人解紛以儉積粟救荒不留餘粒督院撫賊慨以身質賊義之遂降上憲屢旌其門

王心民 正寧人廩生侍繼母病吮癰嘗藥寢食俱廢人皆稱之至敬兄如父世尤罕有

王訪 環縣山城堡人時用兵糧缺訪捐米豆五十石給官銀二百五十兩堅辭不受有司旌其門表

劉英 寧州人年二十八始奮志讀書舉成化甲午鄉薦秉

慶陽府志 卷之二十六

孝義

六

性公直尤嗜學嘗出粟救荒全活者衆成名後每謂人曰吾初志不求進取今吾親老可輕出耶遂不仕

強不息 安化人庠生節孝傳家親沒廬墓於河西樊家坪負土三年未嘗少懈天啟丙寅賜節孝雙全碑

白張氏 白承武妻姑疾不起百藥弗愈氏焚香泣禱割肌食姑獲愈有司旌其門

楊惟勤 安化人節婦強氏子孝子不息甥也事母至孝博物洽聞經書再閱終身不忘家貧廣授生徒以束贄奉母雖身無完衣而事親備極滋味

王信 寧州人天性篤孝幼遵朱子家禮事二親備極權愛

父沒廬墓三年母歿年近六旬戒勿廬墓信乃居祠三年足不出戶一如父喪有司屢旌其門著有廬墓集上達說共若干卷後死節正陽縣見忠節

曹瀛 寧州人庠生家貧至孝父卒於京瀛徒跣負骨還樵採奉母母疾篤泣禱於神密割股以進母疾遂愈

王復古 寧州人七歲而孤母劉氏年二十有五守節撫之復古力農以供菽水母肘後生一惡瘡求醫弗效割股以啖母旬餘愈母壽八十四古七十七

劉儒 寧州人廩生四世同居人以張公藝稱之

董八紘 字翊皇寧州人歲貢父歿廬墓負土築封母疾篤幾

慶陽府志

卷之二十六

孝義

七

危顛天身代遇一異僧投餌吐塊如石而愈尋失僧所在學使旌其門

傅偉 寧州人母積疾兼瞳睛反背家貧不能延醫哭禱於神割股以奉母甘之病立起瞳睛如初

李恭 寧州人慷慨好施成化年大饑捐粟千餘石販本州及正寧所活甚衆舉鄉飲

朱用賢 號蓋齋寧州人庠生事繼母孝撫幼弟助人婚娶給貧者衣食焚貸百餘紙券力行善事老而彌篤八旬無疾終

楊元柱 寧州人崇正間三遇奇荒輸粟賑貧焚貸券三百紙人咸義之

王 信 寧州人信之弟崇正十四年大饑斗米三兩貸粟數百石不責人償

闔鳴陽 寧州人應儒之子貢生號文瑞博涉經史工文善詩孝悌純朴人有借貸必應親焚其券嘗拾遺金覓主還之賑饑恤苦施藥捨棺好施不倦後家業蕭索且垂老怡然也道逢巨寇望而指曰此佛人某也相率引去學使旌其門

路 誥 正寧人廬墓見舊志

焦 餽 正寧人廬墓見舊志

仇傳香 正寧人中崇正庚午鄉舉事父母竭力奉養朝夕定省四十年如一日父卧病五載日侍湯藥嘗穢以驗輕重居

慶陽府志

卷之二十六

孝義

八

表三年哀毀骨立事繼母友兄弟內外無間

國朝

姚成儒 環縣庠生事親先意承志夏清冬溫家貧父嗜酒每食必備母痰疾三年躬親扶掖藥必口嘗居喪飲泣酒漿罕入乾隆二年准給六品頂帶

左 縑 寧州人父歿事母孝母病每夜焚香叩天願以身代嘗糞以驗吉凶朝侍側衣不解帶者三年紳士合詞請旌

穆三益 正寧人母歿頂土築墳廬墓三年

方從聖 號塩梅寧州人臨潼教諭九歲失怙母氏茹苦教育後成名人稱節孝

王天寵 安化人雍正乙卯拔貢幼有至性事親有孝行乾隆二年建坊 旌表

黃源 安化人庠生讀書明大義舉孝行乾隆十年建坊 旌表

楊維元 安化人事親色養備得歡心歿後廬墓三年不御甘脂乾隆十三年建坊 旌表

黃成 字文若安化人歲貢品誼端方不隨流俗克盡孝道晨昏侍奉儼若孩提父母歿茹素終身不入內室日卧柩前寢苦枕塊無間寒暑邑令嘉其至性舉鄉飲正賔後任秦安訓導

慶陽府志

卷之二十六

孝義

九

朱宏量 安化人習小藝餬口事親孝晨昏定省不少懈弛年二十五歲父背癱醫治不痊惶懼無策因告天割股以進遂愈迨三十四歲母染時疫奄奄待斃亦割肉食之病亦愈未幾父母祖繼歿自痛不能廬墓每夜守塚號泣風雨無間母在日於除夕人日心多恐怖值是夜量必赴墓誦經達旦至性篤摯如此

宋鵬鷗 寧州人庠生工帖括至性過人會父覲病彌留思食鹿脯徧覓城市不得因深入叢山幾陷虎穴生獲麋鮮以歸病愈色養承權所需必得事聞建坊 旌表

李綿社 合水人賦性端介言笑不輕至承權膝下則婉答可

掬或親有怨跪而受笞復笑語自若補弟子員家貧無以養躬耕北山之麓盛暑執爨嚴冬負薪不少輟母病祈以身代嘗藥舐穢衣不解帶蟣虱繞身弗知也及歿哀毀骨立寢於父所口不茹鹽菜者三年

李 曇 合水人增生兄嫂相繼歿長侄亦歿家貧甚獨遺幼侄方四歲曇收養之讀書婚娶無異己子臨終召戚友籍家資與已二子三分之且云常自念惟恐有堪見兄於九原者

謝建南 合水人與弟式南各生一子俱壯歲而鰥遂不復娶兄弟同寢處有長枕大被之風建年八十七歲終式少三歲

慶陽府志

卷之二十六 孝義

十

哀號不已亦隨卒至今三世亦同居無間焉

唐際虞 合水人歲貢工科給事魁之子從父至京師值闖賊亂執魁索金幣虞貽賊脫父以身代之榜掠殘毒無懼色尋亦得脫歲丙申邑饑出粟貸鄉里或以厚值償之 曰偶通有無非權子母也不受息亦不受直

陶 璞 合水人幼以孝聞親歿廬於墓側負土築塚三年米嘗少怠由歲薦歷莊浪鳳沔三學博以巡按御史薦簡貳蒲圻委璞督餉路值閩王扁步稍急即墜無完膚璞柵木成梁全沽甚衆時用兵西山軍中疫日棄尸道旁因白於將假營卒數千人於腥穢中親督坎塵感其誠咸樂效命後致仕歸

孫呂亦以孝謹聞

67

表 臣 正寧人康熙十三年村中崖崩壓死無算臣之父亦被壓死臣痛父尸不得遶土號泣淚盡以血入夜大風雨震電及旦土解獨得臣父尸且完好無殘人以為孝通神明云于 冕 正寧人貢生父亨吉^任延安府學訓導卒於任所冕扶柩歸途中猝遇暴虎勢無可避冕乃伏柩前而哭曰不孝本應飼虎父柩不能歸厝死不瞑目矣祝未畢虎竟去殆冕孝心之所感也

姚乃速 正寧人庠生好讀書性尤慷慨仗義鄉里有貧乏必賙給之積欠不能還輒焚其券族人待以舉火者三十餘家

慶陽府志

卷之二十六

孝義

十一

歿之日里人為之立碑曰惠族卹貧

鞏楊氏 正寧處士鞏爾甸妻結褵後夫出門數年代供子職事翁姑備得歡心翁 莖莫以禮姑復病氏乃禱於雲寂寺割臂肉和藥以進姑病遂瘳氏亦無恙

鞏鄭氏 正寧處士鞏爾墉妻佐夫孝養翁病床思肉食家貧無以應氏乃引刀割股肉作羹以進翁啖之甘問所從來氏詭詞以對忍痛卧床則托以疾不欲令翁與夫知也商邱陳履中作弟鄭氏行以誌之

譙盧氏 合水生員譙翰妻有祖姑老病不能動移氏事之甚屋舍將傾人皆竄避氏在外呼援莫應急 入負祖姑

出屋竟遽覆同壓死焉

68

陶李氏 合水人知州李巍然曾孫女庠生陶呂妻呂以孝聞
而氏亦能助之翁病手足不仁飲食皆氏以匕箸進事姑尤
謹歲饑命二子出粟以貸且曰恨無餘力以普 鄉人耳
八十終里隣莫不哀感

慶陽府志

卷之二十六

孝義

十二